



**ARGIN-A DLA PAS
PREGA PËR NOI**

«Oh Gerusalem, se mai im dësmentièissa 'd ti,
ch'a s'arstècca mia man drita!
S'im arcordèissa nen ëd ti,
se it butèissa nen dzora a tuta mia argioissansa,
ch'as taca a mè palé mia lenga!»

(Psalm 137)

Èl Sant Rosare

Misteri glorios | Mystères du Christ Glorieux

1^m L'Arsuression gloriosa 'd Nosgnor Gesù Crist | La Résurrection

2nd L'Assension ëd Gesù Crist al Siel | L'Ascension

3^s La vnùta dl'Èspìrit Sant su Maria Vèrgin e j'Apòstoj riunì ant ël Cenàcol | La Pentecôte

4^t L'Assunzion ëd Maria Vèrgin al Siel | L'Assomption

5^t L'ancoronassion ëd Maria Vèrgin Argin-a dël Siel e dla tèra e la glòria dj'Àngej e dij Sant | Le don de la Cité du Saint Amour

**Ant ël nòm dël Pare,
dël Fieul
e dl'Èspìrit Sant.
Amen.**

Nosgnor, ven a salvene. *Ven dene tò agiut.*

Credo apostòlich I chërd an De, Pare tutpotent, creator dël Cel e dla tèra; e an Gesù Crist, Sò ùnich Fieul, nòstr Signor, ch'a l'é stàit concepì d'Èspìrit Sant, a l'é nassù da Maria Vèrgin, a l'ha patì sota Pònsio Pilat, a l'é stàit crucifià, a l'é mòrt e a l'é stàit sotrà; a l'é calà zu ant ël regn ëd la mòrt; al ters di a l'é arsussità; a l'é montà an Cel, a l'é sètà a la drita 'd De Pare tutpotent: da là a vnirà për giudiché ij viv e ij mòrt. I chërd ant l'Èspìrit Sant, la santa Cesa catòlica, la comunion dij Sant, la remission dij pca, l'arsuression dla carn, la vita eterna. Amen.

Salve, Regin-a, Mare dla misericòrdia, vita, dosseur e speransa nòstra, salve! IT pregoma, coma fieuj ëd nòstra prima mare Eva, e sospirand e pianzend da costa comba 'd lerme i ciamoma Tò agiut. Për sòn, Ti che it ses nòsta Avocata, pòsa ansima a noi ij Tò euj pien ëd misericòrdia e spòrz a noi, dòp cost temp d'esili, Gesù, frut benedì ëd Tò sen. Òh misericordiosa, òh pietosa, òh santa Vèrgin Maria.

Pare nòstr, che it ses an Siel, che tò Nòm a sia santificà, ch'a ven-a Tò regn, ch'as fasa Toa volontà an sla tèra com ant ël Siel.

Dane ancheuj nòstr pan ëd tuit ij di, pèrdonne nòste ofèise, coma noi i pèrdonoma coj ch'a l'han ofendune, e slontan-a da noi la tentassion, ma ten-ne san dal mal.

Amen.

Ave, Maria, pien-a 'd grassia, ël Signor a l'é con Ti.

Ti it ses la benedì antra tute le fomne, e benedì a l'é 'l frut ëd tò sen, Gesù.

Santa Maria, Mare 'd Nosgnor, prega për noi peccador, àora e ant l'ora 'd nòstra mòrt.

Amen.

Glòria al Pare, al Fieul e a l'Èspìrit Sant com a l'era an prinsipi, ora e sèmper ant ij sécoj dij sécoj. Amen.

Requiem Æternam L'arpòs Etern daje a lor, Nosgnor, e la lus senza fin a lusa për lor; ch'a s'arpòso an pas. Amen.

Orassion ëd Fàtima Òh Gesù, pèrdon-a nòste colpe, dësfindne dal feu dl'infern, pòrta an cel tute j'ànime, con prim riguard për cole che a l'han pì da manca 'd Toa misericòrdia.

Litanie dla Madòna

Nosgnor, *pietà*
Gesù Crist, *pietà*
Nosgnor, *pietà*
Gesù Crist, *ëscotne*
Gesù Crist, *esaudisne*
Pare dël Cel, che it ses De, *avèj pietà 'd noi*
Fieul, Redentor dël mond, che it ses De
avèj pietà 'd noi
Spìrit Sant, che it ses De, *avèj pietà 'd noi*
Tèrnità Santa, De ùnich, *avèj pietà 'd noi*
Santa Maria, *prega për noi*
Santa Mare 'd Nosgnor “
Santa Vèrgin ëd le Vèrgin “
Mare 'd Gesù Crist “
Mare dla Cesa “
Mare dla Grassia divin-a “
Mare 'd purità “
Mare 'd castità “
Mare sèmper vèrgin “
Mare senza macia “
Mare amàbil “
Mare maravijosa “
Mare dël Bon Consej “
Mare dël Creador “
Mare dël Salvador “
Mare misericordiosa “
Vèrgin pien-a 'd prudensa “
Vèrgin degna 'd venerassion “
Vèrgin degna 'd làuda “
Vèrgin potentia “
Vèrgin indulgenta “
Vèrgin fidela “
Specc ëd giustissia “
Sorgiss ëd saviëssa “
Motiv ëd nòsta gòj “
Tabernàcol ëd l'Èspìrit Sant “
Tabernàcol ëd la glòria eterna “
Tabernàcol consacrà al Signor “
Reusa dël Siel “
Ròca 'd Dàvid “

Ròca inespugnàbil *prega për noi*
Ca tuta d'òr “
Arca dla Neuva Aliansa “
Pòrta dël Siel “
Stèila dla matin “
Santà dij malavi “
Arfugi dij peccador “
Consolassion dij sagrinà “
Agiut ëd tùit ij cristian “
Argin-a dj'Àngej “
Argin-a dij Patriarca “
Argin-a dij Profeta “
Argin-a dj'Apòstoj “
Argin-a dij Màrtir “
Argin-a dij vèr cristian “
Argin-a dle vèrgin “
Argin-a 'd tùit ij Sant “
Argin-a concepìa senza pca original “
Argin-a assunta an Siel “
Argin-a dël Rosare Sant “
Argin-a dla famija “
Argin-a dël Piemont, ëd Nissa e 'd Savòja “
Argin-a dla pas “

Agnel ëd Nosgnor che it ëscancele ij pca dël mond,
pèrdon-ne Nosgnor
Agnel ëd Nosgnor che it ëscancele ij pca dël mond,
scotne Nosgnor
Agnel ëd Nosgnor che it ëscancele ij pca dël mond,
avèj pietà 'd noi.

Prega për noi, Santa Mare 'd Nosgnor,
e i saroma degn ëd le promësse 'd Gesù Crist.

Pregoma

Nosgnor, it pregoma che it concede a noi, tò servidor,
che i peusso gòde sèmper la santà dl'ànima e dël còrp.
E grassie a l'intercession dla Beata Sèmper Vèrgin
Maria i peusso esse liberà da le soferense 'd costa vita
e i peusso pijé part a la gòj senza fin dël Paradis.

Për Gesù Crist Nosgnor. Amen.

Al calé dël sol dij 7 dè Stèmber nòsti cé a j'ero costumà a anvisché un lumin fòra dla fnesta 'd ca, për armersié la Madòna për
Soa proffession, an memoriand ël di dla Vitòria e dla liberassion ëd Turin e dj'Èstat ëd Savòja dël 1706.

Èl di apress, j'8 dè Stèmber, as montava tùit a Soperga për na festa arligiosa e patriòtica ansema. Na tradission ch'a l'é nassùta
ij prim ani dòp l'assedi, cand a l'era dabon un pelerinage, për via ch'a-i era nen dè stra ch'a mnèisso an sël brich ëd Soperga
e la gent a dovìo graviole për ij bòsch. Con la costrussion ëd la Basilica e dle stra, e peui dla «dentera», a l'era vnù a esse 'n
rëscontr popolar andova ch'as fasìa marena ant ij pra com a Pasquëtta, na tradission ch'a l'é ternisse mach con l'ùltima guèra.
Da quatr ani an sà i l'oma arpijà costa tradission, an arnovand ij Vot ëd Soperga.

A l'é rivaje l'ora ch'i s'arpijo lòn ch'a l'é nòstr, a parte dai simboj, dai valor e da la memòria. Ij Vot, ant l'ocasion ëd la Festa
dla Natività dla Vergin-a Maria e për la liberassion ëd j'Èstat ëd Savòja i j'esponoma për delivresse da tut ël mal ch'a l'é intrà
ant nòsta vita e për trové torna nòsta libèrtà, individual e 'd pòpol.

Is trovoma ancheuj sì-amont, ansema a nòsti compatriòt ëd Nissa e Savòja, për la Santa Mëssa, ël Rosare, l'Imn nassional
artrovà (La Marche de Savoye) e nòsti Drapò, për ciameje a la Madòna 'd dene torna na man e 'd ten-e Piemont Savòja e
Nissa sota sò mantel.